

En viadi tras la Val Scalina

Precipizis snuavels, generals en guerra e stinchels cun il diavel

■ **La Val Scalina (Schöllenschlucht) è ina val e chavorgia cun paraids-crap impressiunantas situada tranter Caschanutta (Göschenen) ed Ursera (Andermatt). Ella separa la part sut dal chantun Uri da la Val d'Ursera e da l'access als pass dal Gottard, Alpsu e Furca. L'istorgia da la Val Scalina furma in chapitel fascinant davart las stentas da l'uman da surmuntar las Alps.** Chats preistorics e da munaidas dattan perditga dal transit tras la Val d'Ursera gia avant e durant il temp roman. Suenter il collaps dal domini roman e l'ingress dals Alemans è la part centrala dal chantun Uri dad oz s'orientada vers il nord, entant che la Val d'Ursera è restada colliada cun la Currezia. Dapi il 8avel tschientaner appartegnava ella a la Cadi, q.v.d. al territori feudal da la claustra da Mustér. Il territori da la Val d'Ursera era cuvert da quel temp da guauds spess ed era strusch populà. Tranter il 8avel ed il 13avel tschientaner ha la claustra laschà runcar ils guauds da la Val d'Ursera e cultivar il terren urbanisà.

Enturn il 1200 èn immigrads Gualsers da lingua tudestga nà dal Valais en la Val d'Ursera ed èn sa domiciliads sin las spundas sumbrivaunas anc betg occupadas da Rumantschs. Els han alura germanisà successivamain la val. Il prinzi-avat da Mustér exequiva la pussanza statale sco patron feudal (masser). Els purs avevan il dretg dal liber feud ereditar e stuevan pajar pesuenter l'uschenumna tschains da l'avat. Els eran libers da persuna ed elegevan in mastral che tegneva dretgira en num da l'avat.




Dal domini claustral a l'orientaziun vers nord

L'avertura dal Gottard a l'entschatta dal 13avel tschientaner ha inizià in agen svilup economic e politic en la Val d'Ursera. Il 1239/40 ha l'imperatur suttamess la val a l'avugadia dals conts da Rapperswil, il 1285 als da Habsburg. Pli tard (1333) èsi vegnì tar cumbats sin il Cuolm d'Ursera / Alpsu tranter ils Confederads (che sustegnevan il barun Donat de Vaz) e l'avat Thüring von Attinghausen (ch'appartegnava ensemen cun l'uvestg Ulrich Ribi a la partida austriaca). Il project dad impressaris dad Uri, Sviz e Lucerna per l'exploitaziun da las minieras d'argient en Val Medel ha schizunt provocà l'assassinat da l'avat da Mustér Jakob Buchhorn tras opposents indigens il 1347. E l'onn 1382 ha il retg tudestg Wenzel consegnà a la Val d'Ursera ina brev da libertad imperiala.

En consequenza da quests conflicts è il domini feudal da la claustra da Mustér en la Val d'Ursera i a fin vers l'entschatta dal 15avel tschientaner. L'onn 1410 ha la Val d'Ursera sigillà in dretg da vischinadi (Landrecht) cun ils Uranais, ella ha dentant resalvà ils dretgs da cumin (Tälrecht). Medemamain èn intgins dretgs (symbolics) da la claustra da Mustér sa mantegnids, tranter auter quel d'approvar il derschader/mastral da la Val d'Ursera e l'obligaziun da far processiu a la festa da son Placi a Mustér ils 11 da fanadur. Il 1649 èn ils d'Ursera sa cumprads libers definitivamain dals dretgs restants da la claustra da Mustér.

La fasa (finala) da la dispita tranter la claustra da Mustér ed ils Uranais per il domini en la Val d'Ursera è er il tema en l'epos «Il Cumin d'Ursera de 1425» da Giacun Hasper Muoth (cumpari l'onn 1896). Muoth sa basa sin in contract istoric dal 1425 che definescha ils dretgs da possess en Val d'Ursera. En libertad poetica lascha Muoth snegar ils d'Ursera l'annexiu tras ils Uranais e quai en preschientscha da l'avat Pieder de Pultengia e cun far valair arguments linguistics.



Punt dal Diavel cun il maletg da la ditga.

E. OBRIST / PIXELIO

L'avertura da la Val Scalina per il traffic

Oriundamain guntgivan ins la Val Scalina sur il Bätzberg, situà en il vest da la val. Il lieu nua ch'ils viandants bandunavan la Scalina sa numna «Steiglen». Qua avev'ins pitgà stgalims (latin: «scalineae») en il grip. Da qua derivan tant il num rumantsch «Scalina» sco er la denominaziun tudestga «Schöllenen» (1420: «Schellenden»). L'avertura da la Val Scalina sezza per il traffic è stada colliada cun ils svilups politics dal 13avel tschientaner.

Durant il 13avel tschientaner ha l'extincziun da famiglias aristocraticas pussantas sco er las cuntraversas tranter il papa e l'imperatur promovì en Svizra che valladas e citads impurtantas èn daventadas independentas. Turitg, Berna, Friburg e Schaffusa èn daventadas, suenter l'extincziun dals Zähringers, l'onn 1218 citads imperialas. Uri (1231) e Sviz (1240) han er retschavì tals privilegis, numnadamain il dretg d'esser suttamess directamain a l'imperatur e betg als conts locals. Cunquei ha l'imperatur Friedrich II segirà la via sur il Gottard durant la guerra cun las citads lumbardas ed ha garantì la loialitad da las citads en connex cun il combat cun papa Innocenz IV.

Il medem temp, enturn l'onn 1230, è il pass dal Gottard daventà ina via da commerzi tras la construcziun da la Punt dal Diavel. L'emprima punt sur la Reuss, la «Stiebende Brugge» (1303), è vegnida costruida tranter il 1150 ed il 1230. L'empr-

ma descripziun enconuschenta d'in viadi sur il Gottard datescha dal 1234. Dapi il 1481 vegn la punt numnada Punt dal Diavel (tudestg Teufelsbrücke u Höllenbrücke). La legenda davart la construcziun da questa punt è enconuschenta lunsch sur la regiun ora (vesair fanestra). L'emprima Punt dal Diavel era ina punt da lain. L'onn 1595 è ella vegnida remplazzada tras ina punt-crap massiva. Lezza è dentant vegnida donnegiada durant la Segunda Guerra da coaliziun (vesair sutvart) e devastada dal tuttatfatg tras in stemprà l'onn 1888. Da vart sanestra da la Reuss pon ins vesair fin oz ils fundaments da quest'emprima punt.

Per guntgir il grip dal Kilchberg, situà curt avant Andermatt, è stada necessaria in'ulteriura punt, la Twärrenbrücke. Quai era ina construcziun giagliarda che consistiva da chadainas che purtavon travs sin las qualas la puntina giascheva. Suenter ina gronda inundaziun l'onn 1707 che ha devastà la Twärrenbrücke han ins tschertgà in'otra soluziun per surmuntar il Kilchberg. Pietro Morettini, in construidor da fortezzas oriund dal Tessin, è vegnì incumbensà da perforar il Kilchberg. L'avust 1708 è l'Urnerloch stà terminà – l'emprim tunnel da via en las Alps insumma.

Cumbats tranter Russ e Franzos

La Val Scalina dueva er furmar il scenari per cumbats sanguinus tranter truppas russas e franzosas durant la Segunda Guerra da coaliziun da l'Engalterra, Austria e

Russia cunter la Frantscha (1798–1802). La stad 1799 ha il general russ Alexander Suvorov stgatschà cun si'armada las truppas franzosas ch'eran situadas en la Lumbardia. Cun agid da l'armada dal general russ Alexander Korsakov avess el alura dui far frunt en la regiun da Turitg a las truppas franzosas da la Helvezia, cumandadas dal general André Masséna. Suvorov vuleva attinger l'armada da Masséna da davos, avanzond cun sia schuldada (radund 21 000 umens) sur il Gottard, il Lucmagn ed il Cuolm d'Ursera (divisiun da Rosenberg) e tras la Svizra Centrala. Ils 24 da settember 1799, suenter cumbats cunter ils Franzos sper Faido ed Airolo, ha Suvorov cuntanschì cun sia truppa il Pass dal Gottard.

Ils 25 da settember è la schuldada russa fruntada en la Val Scalina sin las truppas dal general franzos Claude-Jacques Lecourbe. Durant la battaglia è la Punt dal Diavel vegnida donnegiada fermamain ed era silsuentar quasi intransibla. Suenter dirs cumbats ha Suvorov la finala pudì avanzar enfin ad Altdorf. Ils 25 e 26 da settember aveva Korsakov dentant pers la segunda battaglia sper Turitg, uschia ch'il plan strategic da reunir las duas armadas russas ha fatg naufragi.

L'armada da Suvorov ha stuì guntgir sur il Pass dal Kinzig en il Muotathal ed alura sur il Pass dal Prigel a Glaruna e marschar ils 6 e 7 d'october – cunquei ch'il general austriac allia, Johann Konrad Hotz, era medemamain vegnì batti sper Schänis – sur il Veptga (Panixerpass) cuvert cun naiv en Surselva (Pigniu). Ils 12 d'october ha Suvorov bandunà cun sias truppas il Grischun sur il Pass S. Glièz ed è turnà via Minca en Russia.

La campagna da Suvorov en las Alps, accumpagnada da malauras, navaglias e cumbats, ha chaschunà grondas perditas. L'istoriografia svizra e russa accentueschan oravant tut la prestaziun militar da Suvorov e renvieschan a la miseria da la populaziun pertutgada da la campagna. Lung la ruta existan numerus monuments e tavlas che regordan a Suvorov. Il pli enconuschent è bain il monument da Suvorov marclà en il grip da la Val Scalina gist dasper la Punt dal Diavel. Quest monument en furma d'ina tarmenta crusch cun inscripziun cirillica ha il stadi russ laschà eriger l'onn 1899 per regordan al 100avel anniversari da la battaglia tranter Suvorov e Lecourbe.

Prosperitad e declin da la Posta dal Gottard

Pervia da la miseria che regiva suenter ils onns da guerra n'ha la Punt dal Diavel en

decadenza betg pudì vegnir remplazzada immediat. Il traffic da transit tras las Alps Centralas guntgiva il pli savens sur il Pass dal Spleia. Pir l'onn 1820 han ins dà l'incumbensa d'eriger ina nova punt. Quella è stada terminada diesch onns pli tard ed exista enfin oz. Sur questa punt passava a partir dal 1830 l'enconuschenta Posta dal Gottard che colliava la Svizra Centrala cun il Tessin e l'Italia dal Nord.

Enturn la mesadad dal 20avel tschientaner na dumagnava la segunda Punt dal Diavel betg pli il traffic creschent. Perquai è vegnida costruida l'onn 1958 ina terza punt, quella giada cun dus vials. Gist sper la punt parade-scha vi dal grip in maletg da la ditga da la Punt dal Diavel, stgaffi da l'artist uranais Heinrich Danioth. A medem temp è er l'Urnerloch vegnì schlargià ed adattà als basegns dal traffic creschent.

A l'entschatta dal 20avel tschientaner dueva schizunt la viafier arivar en la Val Scalina – en la chavorgia che valeva durant tschientaners sco nunpassabla. Il 1912–1917 è vegnida costruida la viafier tras la Scalina ed il 1926 è la lingia da viafier Brig–Gletsch–Mustér (Viafier Furca-Alpsu) vegnida messa en funcziun. L'onn 1961 han las duas viafiers fusiunà e sa numnan dapi il 2003 Viafier Matterhorn-Gottard.

Sper quest schlargiament da las vias da traffic tras la Val Scalina ha cumenzà vers la fin dal 19avel tschientaner in ulteriur chapitel, numnadamain l'intenziun da sviar la Val Scalina ed il Gottard «tras il grip». L'onn 1881 è vegnì avert il tunnel da viafier dal Gottard che maina sur ina lunghezza da 15 kilometers da Gösche-



L'emprima Punt dal Diavel.

MALETG DA CASPAR WOLF (1777)

nen ad Airolo. Quest'immensa prestaziun tecnica ha da quellas uras fatg furora en l'entira Europa. Las lavurs da construcziun èn dentant stadas colliadas cun immens sforzs finanzials e materials e cun sacrificis e tragedias umanas da vart dals radund 3000 lavurers.

Dapi l'avertura dal tunnel dal Gottard han la Val Scalina e la Posta dal Gottard ina muntada plitost regiunala. Questa tendenza è anc vegnida rinforzada tras l'avertura dal tunnel dal Gottard per autos l'onn 1980. Ed er cun la Nova lingia da viafier tras las Alps (tranter Erstfeld e Bodio) cuntinescha la visiun da viager sut las Alps ora enstagl da surmuntar ellas. Malgrà quai resta la Val Scalina in magnet turistic ed in lieu d'inscunter fascinant tranter precipizis impressiunants e las stentas da l'uman da surmuntar quels.

La preschentaziun:

Dossier «Val Scalina»

Dapli infurmaziuns:

chatta.ch/?hiid=2219
www.chattà.ch

La ditga da la Punt dal Diavel

La ditga raquinta ch'ils Uranais avevan empruvà da construir ina punt sur la Reuss selvadia. Bleras giadas eran berniers e lur mils cun lur chargias crudads en la profunditad. Malgrà tuttas emprovas n'èsi dentant betg reussi da construir ina punt ferma. Sinaquai haja il mastral exclamà desperadamain: «Duai il diavel construir ina punt!» E pelvaira, il diavel è cumpari ed ha fatg als Uranais ina proposta. El vegnia a construir quella punt, sco cumpensaziun veglia el però l'emprima creatura che passia sur la punt.

Ils Uranais èn stads d'accord e gia trais dis pli tard manava ina nova punt ferma e stabila sur la chavorgia. Da l'otra vart da la punt steva il diavel e spetgava. Ils Uranais na savevan ussa betg tgi trametter suravi sco emprim. In pur ha la finala gi l'idea geniale: El

ha laschà liber ses buc-chaura ed al ha chatschà sur la punt. «Quai è l'emprim, quel pos ti ussa tegnair!», han ils Uranais clamà.

Il diavel sa sentiva engianà. Furiond da la ravgia ha el tschiffà in crapun ed al ha purtà vers la punt. El vuleva puspè destrui s'ovra. Ina dunna veglia che vegniva encunter al diavel sin via ha pudì evitar quai. Ella ha spert sgriffà ina crusch sin la vart davos dal crapun. Cura ch'il diavel ha vis la crusch, ha el sdermanà il crap plain gritta en la profunditad. Ma el n'ha betg tutgà la noda ed il crap è sa tschentà en vischinanza dal vitg da Göschenen. Là sa chatta quest crap dal diavel anc oz. Il 1977 è il bloc da 220 tonnas vegnì spustà per 127 meters, perquai ch'el bloccava il trassé da la nova autostrada dal Gottard.